

朝鮮群書大系續々第十四輯

東文選 七

朝鮮古書刊行會

大正三年十二月二十四日印刷
大正三年十二月二十八日發行

會員豫約費一册金參圓
會員外一册賣價四圓

朝鮮京城旭町二丁目六十一番地

朝鮮古書刊行會代表者
編輯兼發行者

釋尾春栞

朝鮮京城明治町二丁目日韓印刷株式會社

印刷者 金崎金平

發行所 朝鮮古書刊行會

朝鮮京城旭町二丁目朝鮮雜誌社

電話一千二百五十番
振替口座京城一三一番

印刷所 日韓印刷株式會社

朝鮮京城明治町三丁目

豫約並發賣取次店 日韓書房

朝鮮京城本町二丁目

豫約並發賣取次店 東京市神田表神保町 同文館

東文選第七輯目錄

卷第一百二十二

墓誌

卷第一百二十三

墓誌

卷第一百二十四

墓誌

卷第一百二十五

墓誌

卷第一百二十六

墓誌

卷第一百二十七

墓誌

卷第一百二十八

墓誌

卷第一百二十九

卷第一百三十

墓誌

墓誌

已

上

東文選第七輯

東文選卷之一百二十一

墓誌

登仕郎檢校尚書戶部侍郎行尚書都官員外郎賜紫金魚袋尹公墓誌

銘

李奎報

予爲文至碑碣銘誌。苟不誠其人信其實。固拒而不受。心竊道曰。南山之石。其有何辜。忍雕損貞姿。書溢美之辭耶。及尹公之卒也。旣得誠其人。又得其實。故不可以不敘。公諱承解。字子長。樹州守安縣人也。三韓功臣內史令明義公尹逢之七世孫也。曾祖檢校太子詹事諱衡。皇祖大樂署丞諱壽。皇考檢校戶部尚書行尚書戶部郎中賜紫金魚袋諱裕。延皇公實尚書府君第二子也。少力學。年十八中司馬試。一科再舉春官。不捷。以門蔭從仕。調補知水州事。判官水州號俗阜。率爲人求得。故鮮克清廉。政皆姑息。吏狃成習。頗緩弛無紀。公到官。一切以法繩之。吏畏憚莫敢正視。凡約束一如條禁。無敢犯者。以政異聞。秩滿除立德宮錄事。尋遷左右衛錄事叅軍事。俄出爲珍島縣令。清約一如水州所理。威愛則加焉。縣在海中。腥陋有蠻獠風。凡應對賓客。不似沿路。他郡奉使者

苦之。公悉更革。便如巨官大邑。又民恃魚鹽。不甚力農。公督令歸畝。始也。民有憚色。及得其入。然後顧樂趨之。雖歲儉不匱。入爲神虎衛錄事叅軍事。癸巳歲。輦下兵起。衣冠搢紳。無不逃竄。公獨守官確固。神色自若。上聞而嘉之。召見面。弊曰。昔聞若之忠勇。今見其實。改授神虎衛別將。公以虎職非本情。故不受。後拜閣門祇候。旋擢監察御史。出爲西北道分臺。先是成州豪黨。擅殺官妓。前後奉使者。初欲窮理其狀。延及平民。無不械縛。闔郡騷擾。未幾置而不問。由是常爲貨賂之藪。公入州。鞫按詳審。得首謀與手殺者。誅之。餘悉不理。一州安之。內外俱慶。入爲尙食奉御。賜緋魚袋。又遷尙書都官員外郎。賜金紫。上嘗遣諫官宋端南方。採訪十年來前後典郡者之政績優劣。水州以公所理。舉爲最。凡三十年矣。宋公曰。朝旨以十年爲界。此甚遼遠。恐違詔條之意。吏民曰。天子所以遣使臣。第求異政耳。尹公遺愛。至今未嘗去。民心尙如前日。故舉之。豈論遠近耶。皆伏地叩頭。其請至痛切。宋公頷而奏之。上益嘉嘆。有司亦不敢訾焉。某年月日。得疾卒于第。年若干。某月日。葬于某山。夫人張氏。大府卿諱忠義女也。生子男二人。曰松筠。曰松竹。松筠嘗倅密城。以清苦嚴毅聞。松竹尙爲散官。女一人。未適人。公爲人資。端直敢言。所至率清素。家無擔石之儲。凡不問家事。怡怡如也。旦夕但以奉官守職爲志。眞朝廷之正人也。而官不過員郎。惜哉。子松筠等。紱公之世系官爵。因人之與。予有舊者。來請銘於予。予不敢拒者。以予先君。

嘗與公同寮。每見訪。袞袞接話言。予雖未測淵源。頗窺畔岸。又所書遺迹。則皆播在人口。而非其嗣之列。以來請者。是非誠其人。信其實者耶。故執筆而銘之云。

遺子百金。惟禍之召。公獨以清。萬世之寶。有鬱斯岡。窾安宅兆。公保於此。迺子孫之保。刻銘納竈。爲後之考。

金紫光祿大夫叅知政事上將軍金公夫人印氏墓誌銘

夫人姓印氏。某縣人也。某官某之孫。左右衛大將軍諱榮寶之第二女。而今叅政相國金諱元義之配也。既笄。歸于金公。夫人自在家。事父母甚篤。友兄弟甚穆。及嫁。移所以事父母者。事舅姑有禮。而加敬焉。移所以穆兄弟而惇夫之族加厚焉。其御婢妾。寬重不苛細。故下雖畏而不厭。叅政公起自將官。凡征戍。裝賚及隨例。醕釀宴飲之費。煩浩不細。夫人皆手親之。無不精辦。略無倦容。公之歷位至宰相。夫人有內助焉。家本饒財。然不以富故。手離女工。子姓諫止之。夫人曰。紡績蠶織。婦職也。類若輩之文書筆硯。烏可須臾離耶。及公之至相位。然後輟而不親。一委妾侍。晚節奉佛尤精。常讀金剛經。生子曰公粹。進士登第。今爲入內侍監門衛錄事叅軍事。兼直翰林院。次曰某。爲將官備宿衛。女子適劉昌緒。今爲將軍。公粹以與予同寮內翰。故來乞銘。銘曰。

肥其家不係財。秉德之靜專。功於國不必身。有子之才賢。嗚呼。男子之無羨。夫

人其有焉

金紫光祿大夫叅知政事判禮部事鄭公墓誌銘

某月日叅知政事判禮部事鄭公薨。方葬也。夫人泣謂典喪事者曰。葬不可無銘石。以識于隧。然無子姓之圖。有以顯後世不朽者。痛莫甚此。予雖婦人。聞正言。某是能文者。若等可爲妾。奉書往乞銘詞。某日予自西掖。待午漏方出。夫人書至。閱其辭。有足憫惜。則吾豈惜鄙文。以孤其意乎。於是序之曰。公諱克溫。全州尙質縣人也。興威衛中郎將諱某。於公爲祖皇。神虎衛大將軍兼太僕卿諱元寧。於公爲考皇。公始籍山東。爲良醞令。同正。召入內侍。進止詳華。又奉職恪謹。上甚器之。先是有征西戰功。未賞也。上以其功。改授金吾衛散員。累轉至神虎衛郎將兼尙書工部員外郎。俄改刑部員外郎。皆仍內侍。又累至興威衛將軍兼禮部侍郎。會江南賊熾。朝廷出三軍討之。公以所領軍赴戰。素得士心。至是益訓練卒伍。每戰俘獲居多。賊遇公軍。輒却無敢當其鋒者。入爲大將軍兼太僕卿。凡所歷重官。自大將軍。循資爲上將軍。轉秩爲尙書右僕射。掌機密爲樞密院副使。帶風憲爲御史大夫。入南臺爲守司空左僕射。登鳳閣爲知門下省事。於鳳閣遷資。爲叅知政事兼判禮部。階自朝散大夫。正議大夫。至銀青光祿大夫。金紫光祿大夫。此其詳也。公所臨。不露圭角。故當時無赫赫大名。及去皆有遺愛。凡攬轡南方。秉鉞北塞。威愛得中。人皆便之。至今頌詠不輟口。嗚呼

公之平生也。謹愿仁和。宜享壽也。而不得究。隱德陰功。宜其昌後也。而卒無嗣。是所未信於冥兆者已。夫人田氏。良醮令某之女也。公之卒。實貞祐三年二月某日也。上聞訃哀悼。輟視朝三日。勅有司襄事。百官會葬。贈諡曰某公。申以誄詞寵之。以某月日葬某山。予則銘其墓曰。

顯允賢考。勇虎洸洸。仍世戴鶡。皆奮而揚。至公大振。鬣鬣欵張。風雲感會。遠步超驥。出將入相。手鉞腰章。機關秘邃。人莫窺量。翼亮四朝。舊德彌芳。云何不淑。豐棟云僵。伯道無兒。天意茫茫。孰承家廟。以奉蒸嘗。何以慰之。國典其喪。百官奔葬。祖道有光。男兒若此。無子何傷。相彼山阿。松檟鬱蒼。宜公之宮。萬世之藏。哀哀夫人。泣涕霑裳。乞銘勤勤。有惻于腸。鐫詞樂石。幽壤焜煌。

金紫光祿大夫守司空尙書左僕射太子賓客田公墓誌銘

夫士方未顯。喜議駁朝廷大臣之出處去就。及身居其地。有不能如其言矣。况官高而志益卑。富貴而能知足者。實今古賢士大夫所難。而非喋喋議駁者之所到也。誰其有之。吾於僕射府君田公。見之矣。公諱元均。字眞精。全州泰山郡人也。曾祖諱某。祖某。皆爲郡司戶。至考諱寵。文始入朝。仕至朝散大夫。神虎衛大護軍兼禮賓卿。以公貴。追贈尙書左僕射。母許氏。亦系出泰山。以公故。累封至泰山郡大夫人。公生而穎異。自童年已有老成體。人固已奇之矣。年十七。舉成均試中之。後因門蔭入仕。嘗以不第爲恨。然博古綴文。自老儒宿學。皆自以

爲不及。庚寅。明宗卽祚。召入內侍。凡指使皆稱旨。上才之。屢以賞寵之。大定二十年。拜權知閣門祇候。壬寅。以殿中內給事賜緋。出知陝州。清廉不受苞苴。其撫細民。未嘗不俯循哀惻。實出哀誠。及繩猾吏。鋤理甚威。發姦摘伏如神。一州敬憚。決獄尤詳審。雖受棒楚者。皆曰田君決之。吾何怨之有。入爲試閣門祇候。遷監察御史。俄拜左司員外郎。尋改吏部員外郎。時怙權橫恣者。求其子入仕。理有不可。公竟不聽。其人深憾之。後遇道上。怒罵歐擊。至蹴墮溝中。雖憲司。佯若不聽。然聞者不以爲辱。而壯公之守正不撓也。累歷侍御史。刑部左司郎中。皆賜金紫。未幾拜將作少監。明年。以戶部侍郎。出知西京留守。西都劇邑。稱難理。公抑強扶弱。威愛相濟。闔都稱頌。無有敢欺。自近世司鑰。未有出公之右者。秩未滿。拜爲衛尉少卿。凡按廉。春州全羅慶尙等三道。褒清發贓。皆物議所歸。允。凡有興利除害者。無不勇爲之。輒疏聞之。上皆允可。歷御史雜端刑部侍郎。泰和二年冬十一月。東京義庇之黨。與草賊巨魁勃尤等起兵。多殘敗州縣。將有犯順之意。上命三軍分道討之。選公爲中軍兵馬副使。凡幕中計畫。多出公之謀議。故中軍之擒斬賊魁義庇勃尤及名賊。不可勝數。公實有力焉。嘗屯雲門山也。公獨完葺廳事。施曲欄倚檻。蒔瓜其側。無慮百本。或告以爲此非種瓜之所。公笑不答。人莫知其故。公密謂幕佐曰。賊忌官軍之先據要嶮。利其速徙。屢驚擾之。故將示以毋動。以絕賊望也。其方略皆此類。終賊滅。竟軍雲門山自

固癸亥在軍中。就加吏部侍郎。明年凱還京師。除拜判將作監兼太子中舍人。乙丑。出爲西北面兵馬使。北俗性剛悍難化。自公下車。略不敢干紀。上嘉之。擢爲樞密院右承宣兼太子庶子。特遣內侍閔璫宣召赴闕。丁卯。因公事見劾。出樞密院爲光祿大夫判太僕事。知御史臺事。知臺勢埒承宣。人愈榮之。而公亦不以爲嫌。戊辰。進拜銀青光祿大夫樞密院副使。御史大夫太子賓客。以親嫌改臺銜爲左散騎常侍。未幾。遷知院事。吏部尙書。大安三年。拜金紫光祿大夫守司空尙書左僕射。司空一品也。公自登是職。嘗喟然嘆曰。吾起平微。無文華虎功。有以輔相官家。徒以刀筆吏官至一品。此已足矣。留之何待。遂引年稱疾。告退甚篤。上不得已允之。公得謝然後欣然肆意。退居于城西之莊。葛巾野服。逍遙偃傲。每與親舊置酒盡歡。以遂揮金之樂。越戊寅某月日。感疾卒于第。享年七十有五。公性慎密。凡政事施爲。其機張鍵閉。人莫窺測。及設而後知之。無敢更議者。敦篤忠信。嘗以卑謙自牧。與人言。開豁坦蕩。莫有畦畛。人樂而忘倦。然內強毅。臨大節有確然不可奪者。娶某官桂氏女。凡生四男四女。男曰甫龍。登進士第。爲內侍大官署令。曰得良。祝髮爲僧。緇秩至三重大師。曰甫龜。爲金吾衛郎將。曰甫麟。爲管絃坊判官中軍錄事女。一適內侍弓箭庫判官安某。一適內侍開城牧監直文某。一適守宮署丞李某。一適隊正李某。皆衣冠搢紳之嗣也。甫龍等。旣卜兆于某山。先葬。日具公之行狀。屬予爲銘。蓋以予嘗從公于

征東幕府。得公之詳。故以爲託。而予可辭乎。敢灑泣濡翰而銘之曰。世薄民偷。天嗇賢士。假如生之。不假以位。道屈莫信。民未蒙利。獨於司空。豁斷厥意。載爵輦祿。悉輟以畀。公受而有。如荷重器。畏盈忌滿。若擎盤水。翼翼忘勞。服勤王事。既肥其國。顧瘠其己。南符西綬。民受其賜。出入臺閣。爲邦之紀。品登一品。猶背負刺。軒裳得釋。四體方肆。退逸于莊。城西之里。幅巾以遊。一杖雙履。願言圖形。寫真孰似。身沒名芳。輝映青史。公死猶生。吾不謂死。新宮之寧。子孫其熾。勒銘貞珉。與山終始。

殤子法源壙銘

沙彌法源。吾子也。捨吾姓而從釋氏者也。年十一。投禪師規公。祝髮爲衲僧。事師甚謹。性警悟。凡使令。輒迎導其意。不須願指。故師最愛之。在寺暴得病。至吾家臥一宵。明日而化。間三日。瘞于山。噫。何其倏忽也如此。歲金龍月黃鍾。剃度。年水馬律夾鍾。反眞。爲僧。凡一十六月耳。予遂爲銘詞。刻三尺木板。納于壙。寓哀而已。其身與銘。不如速朽。何必鑿諸石。壽其傳哉。銘曰。僧其服一日足。况二冬一夏。汝死猶可。

京山府副使禮部員外郎白公墓誌

歲甲申月孟秋。京山府守白公。卒于理所。夫人至京師。旣襄事而將葬也。知予於君爲舊執。使其孤希諗叔明等。來泣乞銘。予於是論次而識之云。君爲人敦

篤謹愿。不抗以自高。不婉而苟順。實醇厚。正直君子也。少力學。工屬文。年十九。舉省試中之。是戊午夏之五月也。至六月。又舉春官擢第。大抵連月再捷。士所難得。而君又年少。故人益異焉。泰和六年。籍屬內侍。居近密者十有九載。以幹事貞固稱。我朝成例。凡禪教選席。使近臣之能文者主之。故上以曹溪之選委君焉。君精汰。選揀所得皆一時名衲子。後多爲法王宗匠。騰蹂叢林者。又西海經契丹寇擾。凋弊尤甚。上遣君爲蘇復使。君以便宜賑貸。所活不可數。民於是幾骨而復肉矣。凡閱官。自句覆院判官。歷補秘書校書郎。衛尉寺注簿。少府寺丞。五遷至閣門祇候。未幾。以禮部員外郎。賜紫金魚袋。拜宣州防禦副使。病不克赴。間一年。復出守京山府。到官數月。病復作。遂不起。享年四十六。以是年九月某日。葬于某山。於戲以君之聰明才幹。得官爵壽命止於此。而文章不得以潤色。皇猷道德。不得以康濟時用。是尤可惜者已。君諱賁。華字無咎。清州藍浦郡人也。故朝議大夫判秘書省事。翰林學士知制誥。諱光臣之子。而故太僕卿贈三重大匡諱司清之孫也。娶尙書左僕射林諱惟謙之女爲配。凡生二男。曰希諱。祝髮爲浮屠。曰叔明。甫冠未仕。君晚喜禪法。自號叅禪居士云。銘曰。於戲白君。止此而已耶。束髮飛騰。意在千里。孰云暴顛。賫志入地。宅兆孔寧。維子孫之祉。

銀青光祿大夫尙書左僕射致仕庾公墓誌銘

觀自古士大夫。其始未嘗不以廉恥操心。滿盈爲戒。而及富貴方酣。率翫惜日月。恬不知退者多矣。我僕射府君。大異於是。年六十有四。已登端揆。則其去台鉉。能有幾級而未踐其地耶。但先六載引退。求避溢寵耳。不然。久已升極秩而猶有餘矣。此易所謂知進退存亡。不失其正者歟。庾氏源于錦城之茂松。在版籍爲甲而公其出也。公諱資諒。字湛然。曾祖諱某皇。檢校太子詹事。祖諱某皇。檢校太子太師。考諱某皇。配某廟功臣。門下侍中。修文殿大學士。判吏部事。贈恭肅公。母張氏。尚衣奉御諱贊之女。此公之世系也。公爲人中和毓粹。莊重寡言。仁信足以感人。清儉足以律世。此公之受之天也。方毅廟時。山東寢盛。公年十六。與貴門子弟。約爲交契。公欲引虎官御牽龍行首。吳光陟。李光挺等與焉。衆莫肯之。公挺然議曰。雖私遊中。文虎俱備。亦得矣。何有不可乎。後必有悔矣。衆咸以爲然。於是使之叅焉。未幾庚寅亂。文臣幾蕩盡。凡人交契者。皆得免。以吳李二將營救甚力故也。此公之自少已有知幾之量也。年若干。以宰相子。直補守宮署丞。尋遷大樂署丞。俄出爲龍岡縣令。其爲政諳練理體。隨發如神。一方稱之。此公之始莅郡也。累歷御史尚衣奉御。侍御史。戶部郎中。御史雜端。賜金紫。大府少卿。兵刑部侍郎。大府卿。知三司事。判大府司宰事。太子詹事。判閣門。知茶房事。階皆正議。尚書右僕射。階光祿。此公之所歷官序也。其或廉察東南。秉鉞東北。則威風所及。無不股弁。然濟以仁信。故民便之。此公之奉使延譽。

也。夫三品正秩。入相可冀。而公之判司宰也。反乞郡痛切。以戶部尙書。出知南
京留守。此公之辭滿忌盈也。公常以選軍使聽軍政。其廳事上欵柱自立。時譁
傳以爲異事。此公之公平無私所感也。其帥關東也。到洛山禮觀音。俄有二青
鳥含花落衣上。又海水一掬許湧灌其頂。世傳此地有青鳥。凡謁聖者。非其人
則不見。此公之惇德至信所致然也。越崇慶二年癸酉。引年乞退甚篤。上不得
已允之。以銀青光祿大夫尙書左僕射。得謝家居。與當時卿相之退逸者。爲者
老會。時或置酒盡歡。凡優游養性十有七年。此公之懸車閑適之樂也。歲己丑
八月七日。詣耆老會。從容宴飲。還于第。明日方午。忽覽八戒文。夜盥浴。尙安然
就寢。及旦呼家人問時。然後惕然而化。享年八十。此公之終也。先是人有死復
生者。自言死至一處。宮觀甚嚴。守者曰。此庾僕射至處也。其說雖荒唐。考公之
行。已無愧。及其終如此。則其言亦不可不信。公之生善處也必矣。娶左承宣金
諱存中女。凡生子三女二。長曰某。爲國學學諭。早卒。次曰某。今爲判太僕事。知
御史臺事。寶文閣直學士。知制誥。季曰某。爲內侍某官。亦先公卒。女長適某官
某。早寡。季適某官某。今寡。方葬也。知臺君具公之行錄。託予以銘。予奉書泣且
曰。嗚呼。古之遺直也歟。吾不復見仁人君子之若公者矣。銘其敢辭乎。遂銘曰。
顯允端揆。惟邦之紀。民方注心。遽釋其位。不至極。公所自避。公則自避。人歎
其意。黃髮壽考。公所不斲。公雖不斲。天固相之。正直感神。柱立鳥馴。於公爲常。

恠者維人。嗚呼舊德云亡。模範疇倚。有山巖巖。水灌其趾。是公之宮。吉祥止止。鑱石納竈。眉目萬祀。

壁上三韓大匡金紫光祿大夫守太保門下侍郎同中書門下平章事修文殿大學士判吏部事致仕琴公墓誌銘

大抵天之報施。與其角者不傳之翼。故凡士之得龍頭選而能遠到者鮮矣。公則不爾。既首登金勝之科。又極踐黃扉之貴。加之壽考。哀榮終始。俱無缺焉。則此豈無得而然哉。蓋必有天所不得不厚者而雖取之多焉。天與之不貳者歟。公諱儀。字節之。舊諱克儀。後改爲儀。系出三韓功臣諱容式之世譜。而桂陽之金浦縣。卽其桑梓也。曾祖諱某。皇神虎衛散員。贈上將軍。祖諱某。皇檢校太子少保。贈左僕射。考諱某。皇昌安宅衛典。以公故。贈左僕射。母徐氏。皇檢校軍器監諱淑之女也。以公故。贈利川郡大夫人。公少力學。工屬文。乙未。入大學。連赴舉。方未第。出理清道郡。痛礪節。清廉。以剛正不撓爲政。一方號清道鐵相公。秩滿。旋補八關寶判官。明年。舉春場擢第一。遂籍內侍。上器使之。積官。至將作注簿堂後官。遂除拜閣門祇候。其清華權要之任。則歷閱尙書吏部員外郎。直寶文閣。左司郎中。起居舍人。知制誥。刑部郎中。太子司經國學直講。御史雜端中書舍人。史館修撰。兵部侍郎。翰林侍講學士。東宮侍講學士。尙書右丞。右諫議大夫。太子贊善大夫。公嘗帶雙學士。至是。又兼三大夫。朝廷榮之。公之居諫職。